

四庫全書

史部

欽定四庫全書

史部

欽定歷代職官表卷三十

三
四

內閣中書_臣瞿_照覆_勘

纂修_兼校勘內閣中書_臣周有聲

謄錄拔貢生_臣蘇廷煜

主 簿 筆 帖 式

大鴻臚寺
主簿
筆帖式

大鴻臚寺
主簿
筆帖式

大鴻臚寺
主簿
筆帖式

大鴻臚寺
主簿
筆帖式

大鴻臚寺
主簿
筆帖式

大鴻臚寺
主簿
筆帖式

大鴻臚寺
主簿
筆帖式

大鴻臚寺
主簿
筆帖式

欽定四庫全書

卷三十三

鴻臚寺

國朝官制

鴻臚寺卿滿洲漢人各一人

初制滿洲三品順治十六年定與漢人俱為正四品

少卿滿洲漢人各一人

從五品

掌朝會賓客祭祀燕饗之儀詔之著位而贊其升降拜跪之節有失朝及不如儀者糾之初順治元年置鴻臚寺設滿洲漢人卿各一人滿洲少卿一人漢人左右少卿各一人左右寺丞各一人十五

年省漢人少卿一人寺丞一人康熙五十二年罷
寺丞官不設乾隆十四年定以禮部滿洲尚書兼
管鴻臚寺事永為常式焉

鳴贊滿洲十有四人漢人二人

從九品

掌儀導及行禮唱贊之事滿洲鳴贊順治初置十
六人乾隆三十七年以一人改屬鑾儀衛司贊鳴
鞭其留寺者實十有四人漢人鳴贊初置八人自
順治二年至十三年先後省四人乾隆七年又省

二人

序班漢人四人

從九品

掌序百官之班位初置二十二人順治十五年省
十人康熙三十八年省六人乾隆七年省二人又
有學習序班以直隸山東山西河南儒學生內考
取初置十有二人乾隆十七年改定專用直隸諸
生以八人為額序班缺以學習者選授鳴贊缺以
序班遞升咨送吏部題補

主簿廳主簿滿洲漢人各一人

從八品

掌行遺文移繕寫章牘順治元年置額初又設有各館主簿後俱省

筆帖式滿洲四人

筆帖式滿洲初置十人後省六人又有漢軍二人

後俱省

職事具吏部簡

歷代建置

三代

周禮秋官大行人中大夫二人小行人下大夫四人司儀上士八人中士十有六人大行人掌大賓之禮及大客之儀小行人掌邦國賓客之禮籍司儀掌九儀之賓客擯相之禮以詔儀容辭令揖讓之節

謹案鴻臚一官自唐六典通典初學記諸書皆以為出於周禮之大行人然古今立制各殊詳考其實漢魏以後之鴻臚與周大行人之職已

有不同而今之鴻臚則與漢魏以後之鴻臚尤
迥不相合何也大行人掌侯國朝覲聘問及王
朝撫諸侯之禮籍於中庸九經之內實兼柔遠
人懷諸侯二者而有之秦漢以降罷侯置守無
復邦交之事即分建諸侯王亦不過封拜時令
大鴻臚擯贊而已會同聘頒久廢不行鴻臚所
主者惟蠻夷朝貢獻見之禮猶大行人職守之
一端其他固已不能一一胷合然當時鴻臚既

領蕃國則一切致殮授館封冊弔慰尚其專司
而殿庭禮儀則別有謁者及通事宣贊舍人等
官以襄其贊導並不屬於鴻臚由唐迄宋相承
未改自金元二代不置鴻臚明初復設是官始
取侍儀傳贊之事悉以歸之而外藩館餼則改
隸諸禮部其職乃與古大異矣今因歷代相沿
皆以大行人為原起故仍繫之於表而復互載
於理藩院及會同四譯館篇以著其實云

說詳
本

秦

冊府元龜秦置典客

章懷太子李賢後漢書注謁者秦官也員七十人
謹案秦典客掌歸義蠻夷其職已分著於理藩
院及會同四譯館二表今以其為鴻臚沿革所
自故仍互見於此至謁者之官亦始於秦史記
范雎列傳載謁者王稽使魏還見穰侯穰侯稱

之為謁君者是也其官主儔贊禮儀正如今鴻臚之職故並繫於此表焉

漢

冊府元龜漢景帝中六年更名典客為大行令武帝太初元年大行更名大鴻臚鴻臚之名自此始也屬官行人令又更名為大行令

漢書景帝本紀顏師古注大鴻臚本名典客後改曰大鴻臚大行令者本名行人即典客之屬官也

後改曰大行令據此紀文則景帝已改典客為大
鴻臚行人為大行令矣而百官公卿表乃云景帝
中六年更名典客為大行令武帝太初元年更名
大行令為大鴻臚更名行人為大行令當是表誤
漢書刊誤劉攽曰史記文景事最畧漢書則頗有
所錄蓋班氏博採他書成之故於景帝世謂典客
為大鴻臚行人為大行由他書即武帝時官紀景
帝世事班氏失於改革耳然則改諸官名在武帝

世無疑非表誤也劉敞曰案景十三王傳河間獻王薨猶云大行令奏謚則非表誤也但官名改易未定史於此追舉最後官名也武帝初大行王恢李息即大行令也

漢書百官公卿表應劭注大鴻臚者郊廟行禮讚九賓鴻臚聲臚傳之也

後漢書百官志大鴻臚卿一人中二千石郊廟行禮贊導請行事既可以命羣司諸王入朝當郊迎

典其禮儀皇子拜王贊授印綬丞一人比千石大
行令一人六百石丞一人治禮郎四十七人

劉昭後漢書志注漢官曰治禮郎其四人四科五
人二百石文學五人百石九人斗食六人佐六人
學事十二人守學事東觀書曰主齋祠儋贊九賓
盧植禮注曰大行郎亦如謁者兼舉形貌

漢書平當列傳少為大行治禮丞功次補大鴻臚
文學蕭望之列傳察廉為大行治禮丞王莽列傳

校尉東海公賓就故大行治禮

謹案漢之大鴻臚所領為諸侯王列侯及歸義蠻夷之事與今鴻臚不同然觀後漢志及應劭注所言則郊廟行禮及延見九賓鴻臚皆有贊導之職漢書蕭由傳徵為大鴻臚會病不及賓贊還歸故官顏師古注謂贊導九賓之事是也蓋鴻臚既主蕃國凡初封及入朝禮應贊拜而郊廟侍祠亦有諸侯王在列故併以其事屬之

今鴻臚之司贊唱其由來固亦有所自耳至治禮郎專主儔贊則當如今鳴贊之職矣

漢書百官公卿表謁者掌賓讚受事員七十人秩比六百石有僕射秩比千石

後漢書百官志謁者僕射一人比千石為謁者臺率主常侍謁者五人比六百石主殿上時節威儀謁者三十人其給事謁者四百石其灌謁者郎中比三百石掌賓贊受事及上章報問員七十人中

興但三十人初為灌謁者滿歲為給事謁者

章懷太子李賢後漢書注十三州志曰謁者皆選孝廉年未五十曉解儻贊者

劉昭後漢書志注荀綽晉百官表注曰漢謁者用孝廉威容嚴格能擯者為之明帝詔曰謁者乃堯之尊官所以試舜賓于四門四門穆穆者也

後漢書梁慄列傳何熙永元中為謁者身長八尺五寸善為威容贊拜殿中音動左右

杜佑通典謁者缺選郎中美鬚者大音者以補之
功次當遷欲留增秩者許之

謹案漢謁者主受事及上章報問當如今之奏
事處官員而擯導威儀亦其所掌故有缺選補
皆以大音者充之與今鴻臚之職尤為相合謹
並著之於表又考史記有大謁者張釋卿漢書
有大謁者劉襄而百官表不見此名疑即謁者
僕射之別稱蓋其職如今之鴻臚卿而給事謁

者則如今之鳴贊灌謁者則如今之序班也

三國

三國蜀志楊戲傳何彥英名宗先主即尊號遷為
大鴻臚

鄭樵通志鴻臚卿魏及晉初皆有之

三國吳志三嗣主傳寶鼎元年正月遣大鴻臚張
儼弔祭晉文帝

馬端臨文獻通考魏置謁者僕射掌大拜授及百

官班次統謁者十人

晉

冊府元龜晉大鴻臚為列卿置丞功曹主簿五官等員江左有事則權置事畢則省

晉書職官志武帝省謁者僕射以謁者并蘭臺江左復置僕射後又省

宋齊梁陳

通典大鴻臚宋齊有事則權置兼官畢則省

隋書百官志梁天監七年以大鴻臚為鴻臚卿置
丞及功曹主簿鴻臚卿位視尚書左丞掌導護贊
拜陳承梁皆循其制官

文獻通考職官錄曰鴻臚卿舊視散騎常侍天監
中視中丞吏部

唐六典齊職儀云東宮殿中將軍屬官有導客局
置典儀錄事一人掌朝會之事史闕其品秩梁有
典儀之職未詳何曹之官掌唱警唱奏之事朱服

武冠陳亦有之

謹案漢魏大鴻臚至梁始除大字改曰鴻臚卿
專掌導護贊拜今鴻臚之制其權輿實本於此
又考通鑑載侯景破臺城入見梁武帝於太極
東堂稽顙殿下典儀引就三公榻據此是齊梁
典儀之官並主引百僚以就位次蓋如今之鴻
臚寺序班也

宋書百官志謁者僕射一人掌大拜授及百官班

次領謁者十人謁者掌小拜授及報章晉省僕射
宋世祖大明中復置秩比千石

南齊書百官志謁者臺掌朝覲賓饗謁者僕射一
人謁者十人

隋書百官志梁謁者臺僕射一人掌朝覲賓饗之
事屬官謁者一人掌朝會擯贊高功者一人為假
史掌差次謁者

通典謁者臺陳亦有之

謹案南朝謁者臺在宋世兼主報章猶沿漢制
至蕭齊以後專主朝覲賓饗之儀節則已全有
今鴻臚寺之職掌矣

北魏

冊府元龜後魏鴻臚卿第二品上後降為第三品
少卿一人第三品上後為正四品上丞從五品中
後降為第七品

通典後魏曰大鴻臚

魏書官氏志太和十五年七月置司儀官高祖詔
羣臣議定百官謁者僕射從第四品上典儀監從
第五品上謁者從第五品中治禮郎從第六品下
太和二十三年復次職令謁者僕射第六品謁者
第九品
文獻通考後魏謁者臺掌導相禮儀僕射二人謁
者三十人

北齊

隋書百官志後齊鴻臚寺置卿少卿丞各一人有
功曹五官主簿錄事等員掌蕃客朝會吉凶弔祭
統司儀署令丞司儀署又有奉禮郎三十人謁者
臺掌凡諸吉凶公事導相禮儀事僕射二人謁者
三十人錄事一人

謹案西漢封拜諸侯王以大鴻臚行事至後漢
而禮儀志所載則皆謁者引贊

後漢書禮儀志
拜諸侯王公儀

謁者引當拜前伏殿下光祿勳讀策書畢謁者
稱臣某再拜侍御史授印綬贊謁者曰某王某

公臣某
初謝

是其職已移之謁者臺惟喪儀內有鴻
臚傳哭之文蓋所司多在凶事故北齊鴻臚之
職但稱掌吉凶弔祭而導相禮儀則專屬之謁
者至唐而司儀今丞專掌凶禮儀式職制相沿
其變遷固有漸也

後周

通典後周官品正三命秋官司儀上士正二命秋
官司儀中士

謹案杜佑馬端臨等皆以後周蕃部賓部中大夫列入鴻臚沿革然其職皆主藩屬朝貢之禮與今鴻臚不同已分繫諸理藩院及會同四譯館表內惟司儀一官掌殿庭禮儀實今鴻臚之職故著之於此篇

隋

隋書百官志高祖置鴻臚寺卿少卿各一人丞二人主簿二人錄事二人統司儀署令二人掌儀二

十人開皇三年廢鴻臚入太常十三年復置煬帝
加置少卿二人

文獻通考隋謁者臺大夫一人掌受詔勞問出使
慰撫持節策授及受冤枉而申奏之駕出對御史
引駕初魏置中書通事舍人官其後歷代皆有然
非今任隋初罷謁者仍置通事舍人十六員承旨
宣傳開皇三年又增為二十四員及煬帝置謁者
臺乃改通事舍人為謁者臺職謂之通事謁者置

二十人

新唐書百官志隋謁者臺有典儀

唐六典隋鴻臚寺有贊者十二人

謹案魏晉以後中書省置通事舍人本掌詔誥

蓋如今內閣學士之職至隋而以代謁者之任

則又主傳宣贊引當如今鴻臚寺之職矣至謁

者大夫為謁者臺長官駕出則掌引駕今定制

凡常朝

御殿以鴻臚卿二人請

駕導

駕蓋即其例則謁者大夫實兼有今鴻臚卿職事矣
又典儀隋書失載而唐志有之亦屬於謁者臺
當如今之序班而鴻臚寺有贊者則如今之鳴
贊也

唐

唐六典鴻臚寺卿一人少卿二人丞一人主簿一

人錄事一人龍朔二年改為同文正卿咸亨元年復曰鴻臚光宅元年改為司賓寺卿神龍元年復舊掌賓客及凶儀之事領司儀署令一人丞一人掌凶禮之儀式及供喪葬之具

舊唐書職官志門下省典儀二員贊者十二人掌殿上贊唱之節及殿廷版位之次凡國有大禮侍中行事及進中嚴外辦之版皆贊相焉

唐六典唐朝置典儀二人隸門下省初用人皆輕

至貞觀初李義府為之是後常用士人領贊者以知贊唱之節贊者掌贊唱為行事之節分番上下亦謂之番官

謹案唐鴻臚所掌自蕃客以外惟主凶儀而殿廷贊唱之事則別以典儀及贊者司之是今鴻臚之職在唐世又屬門下省矣至典儀掌版位次序如今序班而當時又兼贊唱以士人為之故其職在贊者之上亦視今制頗有不同云

新唐書百官志通事舍人十六人從六品上掌朝見引納殿廷通奏凡近臣入侍文武就列則導其進退而贊其拜起出入之節

武德四年廢謁者臺改通事謁者為通事

舍人

謹案唐通事舍人即隋通事謁者而改隸於中書省職在贊導羣臣拜起出入儀節正如今之鴻臚寺與典儀所司大畧相似而互屬兩省史志並不詳其分職之由以開元禮考之如蕃國

來朝儀則典儀位於官縣之東北贊者二人在南差退舍人引蕃主入門典儀贊拜禮畢舍人與蕃主俱退又元旦冬至朝賀儀百官入舍人引就朝堂前位皇帝升座百官以次入就北面位典儀曰再拜贊者承傳在位皆再拜稱賀禮畢典儀曰再拜通事舍人以次引北面位者出又元旦冬至大會儀典儀一人升就東階上通事舍人引王公以下入就位侍中稱制延王公

等升殿典儀承傳階下贊者又承傳在位者皆再拜應升殿者諸東西階升羣臣上壽典儀曰再拜階下贊者承傳在位者皆再拜其進酒進食並同據此是典儀位在殿上當如今大朝日立於

太和殿東西檐第二柱下之鳴贊官其贊者位在階下當如今承傳行禮之鳴贊官而通事舍人引王公等出入當如今引王公百官入

午門左右門及左右掖門之鴻臚寺官也當時殆以通事舍人有傳宣詔命之事故屬之中書省而今則以其職俱併入鴻臚耳

五季

冊府元龜後唐莊宗詔諸寺監各只置大卿官屬並權停

五代史王景崇傳明宗即位拜通事舍人歷引進閣門使

謹案五季官制最為闕畧當時寺監皆依唐制則鴻臚亦必備官特其文不見於史耳至通事舍人在唐本以文臣補授後唐明宗以王景崇為之則改用武人逮宋而閣門諸官皆為右職矣

宋

文獻通考宋鴻臚寺判寺事一人以朝官以上充元豐官制行置卿少卿丞主簿各一人卿掌四夷

朝貢宴勞給賜送迎之事及國之凶儀中都祠廟
道釋帳籍除附之禁令少卿為之貳丞參領之建
炎後廢鴻臚併入禮部

謹案唐宋鴻臚皆主蕃國及凶儀與今鴻臚職
掌全不相合以官制沿革所自未可盡畧故仍
繫之於此表焉

章俊卿山堂考索宋朝東上閤門使西上閤門使
凡取稟旨命供奉乘輿朝會游宴及贊導三公羣

臣蕃國朝見辭謝糾彈失儀之事使副專之舍人
以下但道班贊唱而已政和官制橫班使副之名
既改為大夫而其職任則命內外官知焉其後所
除總名知閣門事仍兼客省四方館之職同知閣
門事乃昔時之所謂副使也故事閣門無通事舍
人而通事舍人沿夫唐制自隸中書省如抽赴閣
門並稱閣門祇俟其後直授閣門通事舍人非舊
制也天禧中去閣門二字政和六年改為宣贊舍

人舊以閣門通事舍人閣門祇候二等此館班清流為進取之基非熟於朝儀不在此選又熙寧四年閣門請擇武臣子弟六人前後殿祇應以閣門看班祇候為名候五年熟識儀數乃除閣門祇候宋史職官志東上閣門西上閣門使各三人副使各二人宣贊舍人十人祇候十有二人掌朝會宴饗供奉贊相禮儀之事使副承旨稟命舍人傳宣贊謁祇候分佐舍人凡文武官自宰臣宗室自親

王外國自契丹使以下朝見辭謝皆掌之視其品秩以爲引班叙班之次贊其拜舞之節而糾其違失若慶禮奉表則東上閤門掌之慰禮進名則西上閤門掌之月進班簿歲終一易分東西班揭帖以進政和六年詔宣贊播告直誦其辭

李心傳建炎以來朝野雜記閤門右列清選也舊有知閤門事同知閤門事多以外戚勲貴爲之其下有閤門宣贊舍人掌唱贊書命閤門祇候掌侍

衛班列乾道間孝宗始仿儒臣館閣之制增置閣門舍人以待武舉之入官者先召試而後命供職滿二年與邊郡遂為戎帥部刺史之選云

李燾續資治通鑑長編天禧四年三月右司諫直集賢院祖士衡言常朝起居日長春崇德殿假日後殿中書樞密文武合班而閣門祇候一員在前隨班再拜側立贊謁以臣愚見未協軌儀欲請自今令通班閣門祇候在前殿則與內殿供奉官以

下同起居後殿則與軍頭司官司起居然後立殿
庭贊謁從之

謹案宋閣門本武職進身之階稱為右列清選
然當時鴻臚既不司贊引凡殿廷禮儀皆閣門
主之通鑑長編載天禧三年十一月閣門與太
常禮院上大祀稱慶合班圖即如今之行禮儀
注景祐四年九月詔閣門於紫宸殿垂拱殿刊
石為百官表位即如今

太和殿前之品級山是閤門所掌實即今鴻臚職
事雖文武制異而官守固無殊也至祖士衡所
云令閤門祇侯先起居而後贊謁者蓋以閤門
祇侯既當側立贊謁自不可更隨班拜跪故令
其先在內起居畢後再立殿庭令三大節大朝
之禮鴻臚寺職事各官先赴

中和殿前行禮畢趨出各就班位候

駕陞殿傳贊行禮正其例耳

遼

遼史百官志南面官諸寺職名有鴻臚寺○通事
舍人院通事舍人統和七年見通事舍人李琬○
東上閤門司太宗會同元年置東上閤門使韓延
徽傳見東上閤門使鄭延豐東上閤門副使○西
上閤門司西上閤門使統和二十一年見西上閤
門使丁振西上閤門副使

謹案遼鴻臚官制舊史已闕職掌亦未之詳以

遼史禮志考之當時殿廷行禮凡引羣臣合班
北向起居引宋使入門及通名祇候贊謝宣諭
皆通事舍人之職祭祀讀祝贊帝后詣拜位受
宋使國書奏牒子引高麗使至殿下引新進士
至丹墀皆閣門使之職而贊拜一節則舍人與
閣門使通掌之是今鴻臚職事在進時亦專屬
此二官也惟是拜起之節祇應以一人傳唱而
遼史載宋使見皇太后皇帝諸儀有契丹舍人

漢人閣使齊贊拜之文未喻其故殆以宋之使臣不諳國語故別令漢人贊唱與他禮不同耳

金

金史百官志閣門

明昌五年閣門官以次排轉除授

東上閣門使

二員正五品

明昌六年省一員作從五品西同

副使二員正六品

明昌六年省一員西同

簽事一員從六品掌簽判閣門事

西同

明昌六年以減副使置

西上閣門使二員正五品副使二員

正六品簽事一員從六品掌贊導殿庭禮儀

西閣門餘

副貳
同

閤門祇候二十五人

正大間三十二人

閤門通事舍

人二員從七品掌通班贊唱承奉勞問之事承奉
班都知正七品掌總率本班承奉之事舊置判官
後罷內承奉班押班正七品掌總率本班承奉之
事御院通進四員從七品掌諸進獻禮物及薦享

編次位序

右屬宣徽院

謹案金代不置鴻臚寺其以閤門掌殿庭禮儀
蓋亦沿宋遼之制也

元

元史百官志侍儀司秩正四品掌凡朝會即位冊
后建儲奉上尊號及外國朝覲之禮至元八年始
置左右侍儀奉御二員禮部侍郎知侍儀事一員
引進使知侍儀事一員左右侍儀使二員左右直
侍儀使二員左右侍儀副使二員左右侍儀僉事
二員引進副使侍儀令承奉班都知尚衣局大使
各一員十六年省左右侍儀奉御通曰左右侍儀

省引進副使及侍儀令尚衣使等員改置通事舍
人十四員三十年減通事舍人七員為侍儀舍人
大德十一年陞秩正三品至大二年置典簿一員
延祐七年定置侍儀使四員至治元年增置通事
舍人六員侍儀舍人四員其後定置侍儀使四員
正三品引進使知侍儀事二員正四品首領官典
簿一員從七品屬官承奉班都知一員正七品通
事舍人一十六員從七品侍儀舍人十四員從九

品吏屬令史二人譯史一人通事一人知印一人

右屬中

書禮部

謹案元承金制亦不設鴻臚寺官而以侍儀司
掌贊導行禮之事準諸令制蓋侍儀使如鴻臚
卿引進使知侍儀事如鴻臚少卿通事舍人如
鳴贊侍儀舍人如序班也

明

明史職官志鴻臚寺卿一人

正四品

左右少卿各一

人

從五品

左右寺丞各一人

從六品

其屬主簿廳主簿

一人

從八品

司儀司賓二署各署丞一人

正九品

鳴贊

四人

從九品後增設五人

序班五十人

從九品嘉靖三十六年革八人萬曆十一

年復設六人

鴻臚掌朝會賓客吉凶儀禮之事凡國家

大典禮郊廟祭祀朝會宴饗經筵冊封進歷進春

傳制奏捷各供其事外吏朝覲諸蕃入貢與夫百

官使臣之復命謝恩若見若辭者並鴻臚引奏歲

正旦上元重午重九長至賜緞賜宴四月賜字扇

壽縷十一月賜戴煖耳陪侍畢頒胙賜贊百官

行禮司儀典陳設引奏外吏來朝必先演儀於寺

司賓典外國朝貢之使辨其等而教其拜跪儀節

鳴贊典贊儀禮凡內贊通贊對贊接贊傳贊咸職

之序班典侍班齊班糾儀及傳贊初吳元年置侍

儀司秩從五品洪武四年定侍儀使從七品引進使

正八品奉班都知正九品通贊通事舍人從九品俱為七

品以下官九年改為殿庭儀禮司設使一人正七品

副三人

正八品

承奉一人

從八品

鳴贊二人

正九品

序班

十六人

從九品

九關通事使一人

正八品

副六人

從八品

十三年改使為司正分左右司副各一人增序班

至四十四人革承奉增設司儀四人二十二年增

設左右司丞四人

正九品

三十年始改為鴻臚寺陞

秩正四品設官六十二員

卿以下員數品級如前所列

又設外

夷通事隸焉建文中陞少卿以下品秩

少卿陞正五品寺丞

陞正六品又改其首領官職名與鳴贊序班皆陞品級

罷司儀司賓二署而

以行人隸鴻臚寺成祖初悉復舊制

孫承澤春明夢餘錄宣德元年四月建鴻臚寺公署於京師

謹案鴻臚本出周官大行人主領蕃國封貢自明代始專掌殿庭禮儀之事遂與歷代建置不同名雖相襲實則漢以後謁者臺唐以後通事舍人閤門使之任也其職在導引備贊故漢世謁者皆於三署郎內選大音者為之而贊拜殿

中音動左右史家至以為美談逮宋世閣門多用勲戚子弟不立員額於是遂為恩倖進身之途宦寺交通營求干謁富商豪子往往得之宣和中宣贊舍人至一百八員閣門祇候至七十員每以過濫為臺官論奏明代亦有鴻臚寺官生支糧肄業世相承襲冗食者多而於贊唱轉不能精練我

朝鳴贊序班設有定額皆選國語純熟聲音洪亮

者俾充其選其有熟習傳贊者即經遷擢以後
亦仍令兼攝以襄大禮與應飭所謂鴻臚傳
之義實為相協朝儀整肅視前代益加明備矣

欽定歷代職官表卷三十三

欽定四庫全書

欽定歷代職官表卷三十四

國子監表

[illegible]

學正學錄

算法館助教

式帖筆

王

| | | |
|------|------|------|
| 算學博士 | 算學博士 | 算學博士 |
| 算學助 | 算學助 | 算學助 |
| 教 | 教 | 教 |

五

國子學 正 國子學 錄 太學學 正 太學學 錄

| | |
|-----|-----|
| 國子書 | 蒙古國 |
| 市也 | 手點單 |
| 豆齊 | |

| | |
|-----|-----|
| 蒙古國 | 國子監 |
| 子學正 | 國子監 |
| 學錄 | 國子監 |
| 國子監 | 學錄 |
| 學正 | 學正 |
| 錄 | 錄 |

國子監

國朝官制

國子監祭酒滿洲漢人各一人

初制滿洲三品漢人四品順治十六年定均為

從四品

司業滿洲蒙古漢人各一人

正六品

掌成均之法以教國子及俊選之士八旗官學亦隸屬焉分經義治事以課諸生月有試季有考以辨其詣力之勤惰學業之優劣而董勸之

國初設祭酒滿洲蒙古漢人各一人司業滿洲二人

蒙古漢人各一人順治十七年省蒙古祭酒司業
員額雍正五年復置蒙古司業一人乾隆十三年
省滿洲司業一人其總理監事大臣自雍正三年
以來始置皆由

特簡無定員

監丞滿洲漢人各一人

初制正八品後
升為正七品

掌學規以督教課察勤惰均廩餼核支銷有不如
規者糾治之員額順治元年定

博士滿洲漢人各一人

初制從八品後升為從七品

掌闡明經說以助教廸與六堂助教學正學錄並
司南學經理事宜初置滿洲博士一人漢人博士
三人順治十五年省漢人一人康熙五十二年又
省一人

典簿廳典簿滿洲漢人各一人

從八品

掌簿書以稽文移之出入員額順治元年定

典籍廳典籍漢人一人

從九品

掌藏弄經史以脩諸生誦習凡書籍之刻板於監者則主其摹印之事以廣流傳員額順治元年定

率性堂漢人助教一人學正一人修道堂漢人助教一

人學正一人誠心堂漢人助教一人學正一人正義堂

漢人助教一人學正一人崇志堂漢人助教一人學錄

一人廣業堂漢人助教一人學錄一人八旗官學助教

滿洲十有六人蒙古八人

助教初制從八品後升從七品學正初制正九品學錄初

制從九品後均升為正八品

六堂助教掌教八旗直省俊選之士學正學錄為
之貳凡諸生之學於黌舍者百五十六人在外講
肄而以時赴學考核者百二十人其持州縣牒赴
監考到分堂學習者無員數每旬以制藝策論試
所習業三年期滿視其等第移吏部註籍而錄用
之八旗官學助教掌分教八旗子弟旗各有學選
滿洲六十人蒙古漢軍各二十人以充學生清文
國語助教詔之蒙古語言文字及騎射蒙古助教

教習詔之經書文藝漢人教習詔之三年學成升其尤者於太學漢人助教初設十有二人順治十五年省六人學正初設十有二人康熙三十八年省六人五十二年又省二人學錄初設六人順治十五年省四人滿洲助教順治元年始設二人於太學尋立八旗官學令六堂分教十五年八旗各建學舍乃省太學員額而別置官學助教十有六人康熙五十七年省四人雍正三年復置蒙古助

教六人亦順治元年置十八年省四人雍正二年復置

算法館助教一人

不分滿洲漢人補授

掌分教算學諸生初康熙九年始選八旗官學生習算法雍正十二年增置教習十有六人乾隆三年罷八旗官學算法教習別立算學設肄業生滿洲漢人各十有二人蒙古漢軍各六人附學生二十四人以漢人教習二人佐訓課助教綜司之凡

線面體三部各限一年業成七政共限二年滿五
歲乃甄錄之視出身有差以欽天監博士天文生
叙用

鄂羅斯館助教滿洲漢人各一人

掌教鄂羅斯所遣入學子弟於官學及六堂助教
內掄選二員兼司之不為額闕又琉球等國有遣
子弟入學者選貢生一人教習而以博士一人董
率之

筆帖式滿洲四人蒙古二人漢軍二人

滿洲漢軍員額順治元年置蒙古員額順治十八

年置

職事具吏部篇

歷代建置

三代

尚書舜典帝曰夔命汝典樂教胄子孔安國傳胄

長也謂元子以下至卿大夫子弟陸德明釋文王

云胄子國子也

謹案太學之制昉於五帝鄭康成引董仲舒說
謂五帝名太學曰成均者是也而教胄子之官
則肇於舜之命夔蓋五帝三王之學政皆由樂
始故以樂官兼之漢魏而後博士官隸屬太常
其意實本於此今故引冠歷代建置之首以明
原起焉

周禮地官師氏中大夫一人上士二人府二人史
二人胥十有二人徒百有二十八人掌以嬖詔王以

三德教國子一曰至德以為道本二曰敏德以為
行本三曰孝德以知逆惡教三行一曰孝行以親
父母二曰友行以尊賢良三曰順行以事師長掌
國中失之事以教國子弟凡國之貴遊子弟學焉

鄭康成注師教人以道者之稱也國子公卿大夫
之子弟賈公彥疏以教國子故使中大夫為之國
子衆使役處
衆故其徒多保氏下大夫一人中士二人府二人

史二人胥六人徒六十人掌諫王惡而養國子以
道乃教之六藝一曰五禮二曰六樂三曰五射四

曰五馭五曰六書六曰九數乃教之六儀一曰祭

祀之容二曰賓客之容三曰朝廷之容四曰喪紀

之容五曰軍旅之容六曰車馬之容

鄭康成注保
安也以道安

人者也賈公彥疏既與師氏同教國子官與府史
別者以其教國子雖同館舍別所故置官有異

周禮春官大司樂中大夫二人掌成均之法以治

建國之學政而合國之子弟焉凡有道有德者使

教焉死則以為樂祖祭于瞽宗以樂德教國子中

和祇庸孝友以樂語教國子興道諷誦言語以樂

舞教國子舞雲門大卷大咸大磬大夏大濩大武
樂師下大夫四人掌國學之政以教國子小舞大
胥中士四人掌學士之版以待致諸子小胥下士
八人掌學士之徵令而比之籥師中士四人掌教
國子舞羽敔籥

禮記王制樂正崇四術立四教順先王詩書禮樂
以造士春秋教以禮樂冬夏教以詩書王大子王
子羣后之太子卿大夫元士之適子國之俊選皆

造焉凡入學以齒

鄭康成注樂正樂官之長掌國子之教

禮記文王世子凡學世子及學士必時春夏學于
戈秋冬學羽籥皆於東序小樂正學干大胥贊之
籥師學戈籥師丞贊之胥鼓南春誦夏弦大師詔
之瞽宗秋學禮執禮者詔之冬讀書典書者詔之
禮在瞽宗書在上庠凡祭與養老乞言合語之禮
皆小樂正詔之於東序大樂正學舞干戚語說命
乞言皆大樂正授數大司成論說在東序

鄭康成注大司

成司徒之
屬師氏也

謹案古者建國君民教學為先而後儒聚訟紛
紜亦莫甚於三代學校之制其異同得失難以
緊論而要其大端不過立學之地入學之人教
學之官三者而已謹以經傳所載叅合諸家折
衷而考論之蓋自五帝建學名為成均其後虞
曰庠夏曰序殷曰瞽宗周人立辟廱於中而以
四代之學環建於外南為成均北為上庠東為

東序西為瞽宗是為五學辟廋為天子承師問道及養老更獻戎捷之地雖世子齒學不得就而四學則令國子肄業焉此外又有門閭之學

蔡邕明堂論云周官有門閭之學師氏教以三德守王門保氏教以六藝守王閭四郊

之學

即禮記所謂虞庠在國之西郊皆皇侃謂四郊皆有之

是為小學故

以四學對辟廋則辟廋為太學而以小學對四學則四學皆為太學矣此立學之地也太胥掌學士之版文王世子學世子及學士必時鄭司

農曰學士謂卿大夫諸子學舞者鄭康成曰學士謂司徒論俊選所升於學者蓋以其教於學故總名之曰學士而其途各異掄選亦有區分如公卿大夫元士之適子以其父兄皆有爵列於國則謂之國子皆當入太學與王子齒其卿大夫之庶子為國子之倅者則謂之諸子皆統於諸子之官而時亦升於太學以教之若鄉遂都鄙所賓興及侯國歲貢者曰選士俊士亦咸

造焉此入學之人也至教之之官立法尤為詳
備其虎門之學則選國子中秀異者使師氏教
之與王子共學不在太學之數而四學之中於
成均學樂德樂舞樂語則以大司樂教之於上
庠學書則以典書者教之於東序學干戈羽籥
則以樂師籥師教之於瞽宗學禮及誦弦則以
執禮者及大師教之而師氏亦兼在東序為國
子論說其義理淺深才能優劣謂之大司成此

教學之官也後世以祭酒為出於師氏之職因以大司成當之不知師氏王舉則從惟在虎門之左必不能常入太學其朝夕授業者固當屬之大小樂正耳

富大用事文類聚成王時彤伯入為祭酒

杜佑通典孫卿在齊為三老稱祭酒

太平御覽韋昭辨釋名曰祭酒者謂祭六神以酒酌之也辨云凡會同饗讌必尊長先用酒以祭故

曰祭酒漢時吳王年長以為劉氏祭酒是也胡廣
曰凡官名祭酒皆一位之元長古者賓得主人饌
則老者一人舉酒以祭地故以祭酒為稱漢之侍
中魏之散騎常侍功高者並為祭酒用其義也
禮記文王世子樂正司業父師司成賈公彥疏司
是職司故訓為主謂樂正主太子詩書之業父師
主太子成就其德行也

謹案祭酒名官始於漢之博士祭酒而如諸書

所載則成周已有此稱蓋取舉酒祭地為義乃
同列中以齒德相推之辭故胡廣以為一位之
元長其曰博士祭酒者謂博士中之最長者耳
與三老祭酒侍中祭酒常侍祭酒同義並非官
號也後世去博士二字而專以祭酒繫銜非其
本意矣至司業之官本隋代取禮記樂正司業
之文以為名而鄭康成原註未及業字之義據
賈公彥疏則業當為學業之業而唐書歸崇敬

傳又載崇敬為國子司業上言司業在禮記樂
正司業正長也言樂官之長司主此業爾爾雅
云大版謂之業按詩周頌設業設虞崇牙樹羽
則業是懸鐘磬之翼虞也今太學既不教樂於
義無取請改國子監為辟雍省祭酒為太師氏
司業一為左師一為右師詔下尚書集百僚定
議以聞議者重難改作其事不行云云是業字
又當為虞業之業顧炎武曰知錄云詩傳業大

版也所以飾柶為縣也捷業如鋸齒或白畫之
爾左氏昭九年傳辰在子卯謂之疾日君徹宴
樂學人舍業禮記檀弓大功廢業並謂此也懸
者常防其墜故借為敬謹之義書之兢兢業業
詩之赫赫業業有震且業是也凡人所執之事
亦當敬謹故借為事業之義易傳之進德修業
盛德大業禮記之敬業樂羣是也然三代詩書
之文並無此義

以上皆
炎武說

是業字古無學業之訓

樂正司業自當作虞業解為長特其名相沿既
久學者或習其稱而昧所由來謹先揭其義於
此焉

秦

冊府元龜秦置博士掌通古今

太平御覽應劭漢官儀曰博士秦官博者通博古
今士者辨於然否

謹案班固稱六國時往往有博士則其官不始

於秦而秦時令博士預朝廷大議脩左右顧問

則所職尤重

秦始皇本紀二十六年議帝號丞相綰等奏謹與博士議上尊號為

秦皇又二十八年始皇浮江至湘山祠上問博士曰湘君何神博士對曰聞之堯女舜之妻而

葬此雖經始皇焚書坑儒之禍而二世時叔孫通

猶待詔博士山東兵起二世尚召博士諸儒生

而問之

見叔孫通傳

是其官仍舊不廢觀李斯所奏

稱非博士官所職天下敢有藏詩書百家語者
悉詣守尉雜燒之可知博士官所職者尚存蓋

猶令其典司經籍也且既以博士為官必有生徒轉相傳授秦本紀載盧生言博士七十人傭員弗用而諸生在咸陽者使御史案問至殺四百六十餘人諸生在驪山為伏機所殺者又七百餘人其數如此之多蓋七十人乃博士員額而所謂數百人者皆諸生之隸於博士官如漢世博士弟子之類耳

漢

漢書百官公卿表博士秩比六百石員多至數十人

漢書武帝本紀建元五年置五經博士元朔五年詔曰太常其議予博士弟子崇鄉黨之化以厲賢才焉丞相宏請為博士置弟子員學者益廣

漢書宣帝本紀立梁邱易大小夏侯尚書穀梁春秋博士

冊府元龜漢興武帝初置五經博士掌教弟子國

有疑事掌承問對本四百石升比六百石初文帝
欲廣遊學之路論語孝經孟子爾雅皆置博士至
是遂罷傳記博士

太平御覽漢舊儀曰孝文皇帝時博士七十餘人
朝服元端章甫冠武帝置博士取學通有修博識
多藝曉古文爾雅能屬文章者為之朝賀位次中
都官吏稱先生不得言君其弟子稱門人也
通典平帝元始四年改博士為博士師

漢書藝文志注段嘉東海人為博士師

後漢書蘇竟傳平帝世竟以明易為博士講書祭

酒

章懷太子李賢注王莽置六經祭酒秩上卿每經各一人竟為講尚書祭酒

漢書儒林傳武帝為博士官置弟子五十人昭帝增滿百人宣帝增倍之成帝末增三千人

謹案西漢博士隸太常馬廷鸞謂有周成均隸宗伯之意然博士雖云太常之屬而每令丞相御史中二千石二千石雜舉以任之故特重其

職稱為學官史記儒林傳公孫宏為學官是也

又稱為儒官漢書師丹傳尚書劾博士申咸炔
欽幸得以儒官選擢脩腹心是也又稱為禮官

王式傳式除為博士衣博士衣而不冠曰刑餘
之人何宜復充禮官是也據史傳所載當時朝

廷大事下公卿議者皆令博士預議

霍光傳廢昌邑王奏

臣敬等謹與博士臣霸臣萬舍臣德臣虞舍臣射臣倉議云云此類甚多

而出使四

方入侍禁近亦多以博士充其選

武帝本紀元狩六年遣博

士大等分循行天下元鼎二年遣博士中等分
循行諭告成帝本紀河平三年遣博士嘉等行
舉潁河之郡陽朔二年關東大水遣博士分行
祝薛宣傳博士申咸給事中平當傳以明經為
博士使行流民幽州孔光傳光為博士數使錄
冤獄行風俗薛廣德傳蕭望之為廣德宜充本
朝為博士
論石渠不但教授生徒而已蓋漢世崇尚經

術博士多擇名流以脩顧問其高第者往往列
為九卿薛宣傳載宣奏故大司空何武師丹故
丞相孔光故左將軍彭宣經皆更博士位歷三
公可與建教化圖安危云云夫以歷位三公之

人而猶必引其曾官博士以為重亦可知其為
一代之清選矣

後漢書百官志博士祭酒一人六百石本僕射中
興轉為祭酒博士十四人比六百石易四施孟梁
邱京氏尚書三歐陽大小夏侯氏詩三魯齊韓氏
禮二大小戴氏春秋二公羊嚴顏氏掌教弟子承
問對本四百石宣帝增秩

馬端臨文獻通考光武中興立五經博士各以其

法教授凡十四博士太常差次總領焉

章懷太子李賢後漢書注漢官儀曰博士十四人太常差選有聰明威重一人為祭酒總領綱紀其舉狀曰生事愛敬喪沒如禮通易尚書孝經論語兼綜載籍窮微闡奧隱居樂道不求聞達身無金痰痼疾三十六屬不與妖惡交通王侯賞賜行應四科經任博士下言某官某甲保舉

後漢書翟酺傳酺為大匠上言光武起太學博士

舍內外講堂諸生橫卷為海內所集

袁宏後漢紀永平中崇尚儒學自皇太子諸王侯及功臣子弟莫不受經又為外戚樊氏郭氏陰氏馬氏諸子弟立學號四姓小侯置五經師

謹案漢東京但有太學之名未聞別建國子學而魏書劉芳傳引洛陽記謂國子學宮與天子宮對太學在開陽門外又以國子學與太學岐為兩地考酈道元水經注洛水東經國子太學

石經北漢魏以來置太學於國子堂云云是東漢太學講堂本名國子堂故又號為國子太學即博士講肄之地並無兩學其洛陽記所云國子學殆指為四姓小侯所建之學也

又案漢武帝立三雍宮說者謂明堂辟廱靈臺也然祇以祠祀上帝並非養士之所故晉灼漢書注謂西京無太學而攷之於史如何武傳稱學長安歌太學下鮑宣傳稱博士弟子濟南王

咸等舉幡太學下又似西京已立太學馬端臨
亦但稱當考而不能定其是非謹以紀傳之文
參稽互證疑西漢雖無太學而博士實有官舍
為聚講行禮之所如王式傳徵為博士既至止
舍中此即博士官舍可知而成帝紀鴻嘉二年
三月博士行飲酒禮有雉蜚集于庭歷階升堂
而雉後集諸府又集承明殿是其地應與諸公
府相近凡鄉飲大射皆就以行事焉故當時即

謂之為太學也自平帝時王莽為宰衡起國學

於郭門之西南為博士之宮中央為射宮

見太平御

覽所引三輔黃圖之文

而光武亦起太學博士舍內外講

堂諸生黌巷於是學官居息諸生講肄之地始與學合矣

三國

三國蜀志許慈傳慈與胡潛並為博士子勛傳其業復為博士尹默傳子宗傳其業為博士

三國魏志文帝紀黃初五年夏四月立太學制五經課試之法置春秋穀梁博士

通典魏置博士十九人

裴松之三國志注樂詳黃初中徵拜博士於時太學初立有博士十餘人學多褊狹惟詳五業並授以是獨擅名

三國吳志三嗣主傳孫休永安元年十二月詔曰其案古置學官立五經博士核取應選加其寵祿

科見吏之中及將吏子弟有志好者各令就業一
歲課試差其品第加以位賞

晉

宋書禮志晉武帝咸寧二年起國子學蓋周禮國
之貴游子弟所謂受教於師氏者也

冊府元龜晉承魏制置博士十九人武帝初立國
子學以教生徒而隸屬太學定置國子祭酒博士
各一人助教十五人博士皆取履行清淳通明典

義者若散騎常侍中書侍郎太子中庶子以上皆得召試元帝初減國子祭酒博士助教為九人大興中又置周易儀禮公羊博士末年增國子儀禮春秋公羊博士各一人合為十一人後又增為十六人不復分掌五經而謂之太學博士秩六百石孝武太元中損國子助教為十員

南齊書禮志晉初太學生三千人既多猥雜欲辨其涇渭始立國子學官品第五以上得入國學太

學之與國學斯是晉世殊其士庶異其貴賤耳然貴賤士庶皆須教成故國學太學兩存之也

太平御覽齊職儀曰晉令博士祭酒掌國學而國子生師事之祭酒執經葛巾單衣終身致敬

謹案周成均之法本以教國子而俊選咸得造焉故其時講業之所惟稱太學未嘗獨取國子為學名也其國子之置學實始於晉代而猶與太學並建稱為兩學潘岳閑居賦兩學齊列雙

宇如一右延國胄左納良逸李善文選注引郭
緣生述征記云國學在辟雍東北五里太學在
國學東二百步是也蓋國學以教胄子太學以
選賢良乃即生徒肄習之地以為別而師儒之
職則固無所區分其稱國子祭酒特舉其所重
者以名官耳

宋齊梁陳

通典宋文帝元嘉二十年立國子學二十七年廢

宋書百官志國子祭酒一人國子博士二人國子助教十人分教國子若不置學則助教惟置一人而祭酒博士常置也

南齊書百官志國子祭酒一人博士二人助教十人建元四年有司奏置國學祭酒准諸曹尚書博士准中書郎助教淮南臺御史選經學為先若其人難脩給事中以還明經者以本位領其下典學二人戶曹儀曹各二人治禮吏八人保學醫二人

威儀二人其夏國諱廢學有司奏省助教以下永
明三年立學尚書令王儉領祭酒八年國子博士
何允單為祭酒疑所服陸澄等皆不能據遂以元
服臨試月餘日博議定乃服朱衣

謹案宋齊祭酒正除者少史傳所載如竟陵王
子良以司徒張緒以太常卿王儉以侍中尚書
令並領國子祭酒蓋如今之總理監事大臣又
宋齊惟置國子學而史載范泰為太學博士則

二名亦可互稱蓋已合國學太學為一矣

冊府元龜梁國子祭酒一人班第十三比列曹尚書又置國子博士二人為九班助教十人班第二又置太學博士八人班第三又置五經博士各一人

司馬光資治通鑑梁武帝天監四年春正月詔置五經博士廣開館宇招內後進於是以賀瑒及平原明山賓吳興沈峻建平嚴植之補博士各主一

館館有數百生給其餼廩其射策通明者即除為吏

隋書百官志梁國學又有限外博士員舊國子學生限以貴賤帝欲招來後進五館生皆引寒門儻才不限人數大同七年國子祭酒到溉等又表立正言博士一人位視國子博士置助教二人

謹案梁代國子太學復分為二博士然實止一學南史到洽傳洽遷國子博士奉勅撰太學碑

可知國子學即太學並非有兩地也

冊府元龜陳國子祭酒秩中二千石品第三博士
品第四秩千石國子助教太學博士並品第八秩
六百石

北魏

魏書儒林傳太祖初定中原立太學置五經博士
生員千有餘人天興二年增國子太學生員至三
千太宗世改國子為中書學立教授博士世祖始

光三年別起太學於城東太和中改中書學為國
子學又開皇宗之學及遷都洛邑詔立國子太學
四門小學世宗時復詔營國學樹小學於四門大
選儒生以為小學博士員四十人神龜中將立國
學詔以三品已上及五品清官之子以充生選未
及簡置仍復停寢正光二年乃釋奠於國學始置
國子生四十六人

冊府元龜後魏國子祭酒本第四品上後增為從

三品國子博士從第五品上後增為第五品國子助教五人從七品太學博士第六品後降為第七品太學助教第八品中四門博士第九品

魏書李訢傳詔崔浩選中書學生學業優者為助教浩阿其親戚恭宗聞之世祖世祖意在於訢遂除中書助教博士

魏書李彪傳初為中書教學博士

魏書劉芳傳太和中芳表曰洛陽記國子學與天

子宮對太學在開陽門外今徙縣嵩瀍皇居伊洛
宮闕府寺僉復故趾國學應在宮門之左至如太
學基所炳在仍舊營構又太和二十年發勅於四
門置學臣案自周已上太學在國四小在郊今太
學故坊基趾寬廣四郊別置相去遼濶檢督難周
計太學坊并作四門猶為太廣以臣愚量同處無
嫌從之

魏書術藝傳殷紹世祖時為算生博士給事東宮

西曹

魏書高祖本紀太和十六年辛皇宗學親問博士經義

魏書孫惠蔚傳為中書博士轉皇宗博士

謹案北魏置國子學於宮門之左太學於城東四門學於四郊各有博士助教官而以國子祭酒總統之三學並立實自魏始據劉芳傳所載太學當即置於開陽門外東漢舊址又以四郊

太遠而併四門學附之其規制如此然考楊街之洛陽伽藍記載閭闔門前御道東有司徒府府南有國子學堂內有孔子像顏淵問仁子路問政在側蓋即所謂國子學而於開陽門外之太學則但云開陽門御道東有漢國子學堂堂前有石經碑高祖題為勸學里而已並未言魏朝別有營構是三學分建雖有其文而未行其生徒講肄者實止國子一學也至四門為小學

蓋仿三代郊外小學以教國人之法。昉於魏而隋唐以後皆因之。今制分設八旗官學以訓迪其子弟。與四門學之在四郊者頗為相近。其算生博士亦與今算學館助教相同。又魏置皇宗學別立博士。魏書任城王澄傳載澄於世宗時上表以宗人有闕四時之業。請修復皇宗之學。詔尚書量宜修立。蓋遷洛以後其事漸廢。故澄請復之。今制左右翼各設宗學一覺羅學四隸。

屬宗人府擇宗室覺羅子弟聰秀者入學以王公總其事而置總管副管教習等員以時課習勸學興行蓋即如魏之皇宗學而法制益加詳備焉

北齊

隋書百官志後齊國子寺掌訓教胄子祭酒一人亦置功曹五官主簿錄事員領博士五人助教十人學生七十二人太學博士十人助教二十人太

學生二百人四門學博士二十人助教二十人學生三百人

北齊書儒林傳齊氏太學博士徒有虛名惟國子一學生徒數十人耳胄子以通經進仕者惟崔子發宋游卿而已

後周

通典後周官品正三命地官師氏中大夫正四命地官小師氏春官太學博士下大夫正三命春官

太學助教小學博士上士正二命春官小學助教
中士

王應麟玉海後周武帝天和二年立露門學置生
七十二人

後周書沈重傳天和六年授露門博士仍於露門
館為皇太子講論

後周書熊安生傳拜露門學博士下大夫

後周書樂遜傳治太學博士轉治小師氏下大夫

謹案冊府元龜稱後周有博士助教而祭酒無聞焉今考後周設官全仿周禮其師氏小師氏即漢魏以來祭酒之職故樂遜以博士轉為此官不得謂之無聞冊府元龜蓋考之未審也至周置露門學蓋本周門闢小學之遺意故別置露門學博士與太學博士命數相同其師氏小師氏殆即兼領此二學者歟

隋

隋書百官志高祖受命置國子寺祭酒一人屬官
有主簿錄事各一人統國子太學四門書算學各
置博士國子太學四門各五人書算各二人助教
國子太學四門各五人書算各二人學生國子一
百四十人太學四門各三百六十人書四十人算
八十人仁壽元年罷國子學惟立太學一所置博
士五人學生七十二人煬帝即位改為國子監依
舊置祭酒加置司業一人丞三人國子學置博士

助教各一人學生無常員太學博士助教各二人
學生五百人

謹案自漢以降博士皆隸於太常至隋而國子
寺始別為一署無所統屬尋又改名國子監并
瓶置司業之官遂至今沿為定式焉

唐

新唐書百官志國子監祭酒一人司業二人掌儒
學訓導之政總國子太學廣文四門律書算七學

天子視學皇太子齒胄則講義釋奠丞一人掌判
監事主簿一人掌印局督監事七學生不率教者
舉而免之錄事一人國子博士五人掌教三品以
上及國公子孫從二品以上曾孫為生者五分其
經以為業周禮儀禮禮記毛詩春秋左氏傳各六
十人暇則習隸書國語說文字林三蒼爾雅每歲
通兩經求仕者上於監秀才進士亦如之學生以
長幼為序習正業之外教吉凶二禮公私有事則

相儀助教五人掌佐博士分經教授直講四人掌
佐博士助教以經術講授五經博士各二人掌以
其經之學教國子周易尚書毛詩左氏春秋禮記
為五經論語孝經爾雅不立學官附中經而已太
學博士六人助教六人掌教五品以上及郡縣公
子孫從三品曾孫為生者五分其經以為業每經
百人廣文館博士四人助教二人掌領國子學生
業進士者四門館博士六人助教六人直講四人

掌教七品以上侯伯子男子為生者及庶人子為俊士生者律學博士三人助教一人掌教八品以下及庶人子為生者律令為顯業兼習格式法例書學博士二人助教一人掌教八品以下及庶人子為生者石經說文字林為顯業兼習餘書算學博士二人助教一人掌教八品以下及庶人子為生者二分其經以為業九章海島孫子五曹張邱建夏侯陽周髀五經算綴術緝古為顯業兼習記

遺三等數凡六學束脩之禮督課試舉皆如國子
助教以下所掌亦如之

冊府元龜唐貞觀初改國子寺為監六年復置國
子司業一人龍朔二年改國子監為司成館祭酒
為大司成司業為少司成博士為司成宣業咸亨
初改司成館復為國子監大司成少司成復為祭
酒司業光宅初改國子監為成均監祭酒為成均
祭酒神龍初改成均監復為國子監

唐書選舉志唐制凡學六皆隸於國子監博士助教分經授諸生未終經者無易業諸學生通二經俊士通三經已及第而願留者四門學生補太學太學生補國子學三班番下日願入學者聽附國子學太學及律館習業蕃王及可汗子孫願入學者附國子學讀書

謹案自北齊立國子寺隋改為監嗣後建國學者皆以國子為名其實當時諸學並建其品官

及庶人之子為生徒者各以差等分隸國子乃
專教三品以上子孫之學以此名監蓋特取其
居首者以繫其餘耳元代以後博士助教總為
一學無分教之法諸生亦不復以貴賤為區別
而學校猶獨蒙國子之名蓋亦沿用隋唐之舊
也又案唐國子監所隸凡七學韓愈昌黎集請
上尊號表稱臣所管國子太學廣文四門及書
算律等七館學生此自是當時定制唐六典祇

稱國子監掌六學者蓋書成於開元之時廣文
學尚未置也然考中葉以後他書所載如何蕃
傳稱六館之士百餘人言於司業陽城李觀書
稱學有六館生有三千亦皆不數廣文在內據
鄭虔傳元宗置廣文館以虔為博士久之雨壞
廡舍有司不復修完寓泊國子館自是遂廢當
時殆因廣文國子併在一館故言學制者仍通
稱為六館歟

五季

冊府元龜唐置國子監祭酒司業博士助教五代因之

五代會要後唐天成三年正月申書門下奏伏以祭酒之資歷朝所貴爰從近代不重此官況屬聖朝方勤庶政須宏雅道以振時風望令宰臣一員兼判國子祭酒勅宜令宰臣崔協兼判

謹案唐書鄭覃傳文宗以覃名儒故令以宰相

領祭酒蓋如今之總理監事大臣後唐以崔協
兼判祭酒當亦沿唐朝舊例也

宋

宋史職官志國子監置祭酒司業丞主簿各一人
太學博士十人正錄各五人武學博士二人律學
博士正各一人祭酒掌國子太學武學律學小學
之政令司業為之貳丞叅領監事博士掌分經講授
考校程文以德行道藝訓導學者正錄掌舉行學

規凡諸生之戾規矩者待以五等之罰考校訓導
如博士之職職事學錄五人掌與正錄通掌學規
學諭二十人掌以所授經傳諭諸生直學四人掌
諸生之籍及稽察出入凡八十齋齋置長諭各一
人掌表率齋生凡戾規矩者糾以齋規五等之罰
仍月考齋生行藝著於籍武學博士學諭各二人
掌以兵書弓馬武藝訓誘學者律學博士二人掌
傳授法律及校試之事小學置職事教諭二人掌

訓導及校責罰學長二人掌序齒位糾不如儀者集正二人掌籍諸生名氏糾程課不逮

章俊卿山堂考索國子監祭酒宋初有判監事有管勾監事待制以上則為判餘為管勾元豐正官名置國子監祭酒掌三學之教法政令崇寧立辟雍置大司成一員為師儒之首位在諸曹侍郎上政和罷辟雍官屬建炎三年併國子監歸禮部紹興三年復置十二年始置祭酒○司業宋有同判

監事同管勾監事或帶職朝官充元豐置司業建
炎三年省紹興十二年復置隆興併省司業不與
祭酒並除乾道七年欲除劉焞孝宗曰司業乃祭
酒之貳並置何妨於是始並置○監丞宋景祐二
年孫祖德請於直講京官內差一員充監丞詔學
官兼領掌錢穀出納之事元豐置祭酒司業而監
之事則丞與焉○國子博士宋國子監初無博士
有直講八人熙寧改為太學博士元豐定制亦無

國子博士大觀元年薛昂乞置國子博士四員與太學官分掌教導從之○主簿以京官或選人充掌文簿或勾考其出入焉元豐元年詔省主簿三年罷書庫官復置主簿○國子正錄元豐定制未置大觀元年薛昂乞置國子正錄凡二員○書庫官以京朝官充掌印經史羣書以脩朝廷宣索賜予之用及出鬻而收其直以上於官建炎三年省紹興十三年復置一員後省三十二年詔學官兼

書庫乾道七年復置○太學博士每經二人掌分
經講授考校程文以德行道藝訓導學者建炎南
渡廢紹興十三年始復建太學置博士二員○太
學正錄仁宗朝胡瑗掌太學其正錄第補諸生熙
寧末興三舍始選官為正錄如學官之例學正五
人學錄五人元祐三年罷命官正錄以上舍內舍
生充後復置命官學正二員紹聖改元復元豐學
制命官學職悉仍舊焉○武學博士武學諭各二

人慶歷三年置學未幾省熙寧五年復置選文武
官知兵者充教授元豐官制行改為武學博士建
炎兵興廢紹興二十六年詔武學博士學諭各置
一員

謹案宋國子監所掌仿唐制以國子太學為二
學分置博士正錄學諭等官而肄習者實祇有
太學一所雖元豐初編修學制所言監以國子
為名而無國子教養之實乞令清要官親戚並

入監聽讀然所置國子生額不過二百人而太學生至四千餘人可知國子太學分教已徒有虛名究之入學者皆俊選之士蓋當時品官子弟多以蔭叙入仕不藉國學為出身之途故雖國子名存而實則與古異矣

玉海元豐七年吏部請於四選補算學博士闕從之詔通算學者就試上等除博士中下等除學諭元祐元年罷崇寧三年復建五年四月罷十一月

復置算學隸秘省大觀四年併入太史局

謹案宋算學不隸國子監與唐制不同又唐四
門學宋於慶厯中暫置即廢書學則崇寧中與
畫學並設有博士學諭正錄各一人初隸國子
監後併入翰林書藝局廣文館則元祐初以四
方游士冒畿縣戶應試者多因置廣文館生許
其執牒驗試亦一時權宜之法今並附見於此

遼

遼史百官志上京國子監太祖置有祭酒司業監
丞主簿國子學有博士助教又有東京學中京學
中京別有國子監與朝官同南京學亦曰南京太
學太宗置聖宗統和十三年賜水碓莊一區又有
西京學

金

金史百官志國子監國子學太學隸焉祭酒正四
品司業正五品掌學校丞二員從六品明昌二年

增一員兼提控女直學國子學博士二員正七品
分掌教授生員考藝業助教二員正八品教授四
員正八品分掌教誨諸生國子校勘從八品掌校
勘文字國子書寫官從八品掌書寫實錄太學博
士四員正七品助教四員正八品

元

元史百官志蒙古國子監秩從三品至元十四年
始立置司業一人二十九年准漢人國學例置祭

酒司業監丞祭酒一員從三品司業二員正五品

監丞一員正六品令史一人筆且齊

解見吏部篇

一人

知印一人○蒙古國子學秩正七品博士二員助

教二員教授二員學正學錄各二員掌教習諸生

後增學正二員學錄二員三十一年增助教一員

典給一人後定置博士二員正七品助教二員教

授二員並正八品學正學錄各二員典書一人典

給一人○國子監至元初以許衡為集賢館大學

士國子祭酒教國子與蒙古大姓四集賽

解見內閣篇

人員選七品以上朝官子孫為國子生隨朝三品
以上官得舉凡民之俊秀者入學為陪堂生伴讀
至元二十四年始置監祭酒一員從三品司業二
員正五品掌國之教令皆德尊望重者為之監丞
一員正六品專領監務典簿一員令史二人譯史
知印典吏各一人國子學秩正七品置博士二員
掌教授生徒考校儒人著述教官所業文字助教

四員分教各齋生員大德八年為分職上都增置
助教二員學正二員學錄二員督習課業典給一
員掌生員膳食○興文署秩從六品署令一員以
翰林修撰兼之署丞一員以翰林應奉兼之至治
二年罷置典簿一員從七品掌提調諸生飲膳與
凡文牘簿書之事仍置典史一人

元史選舉志至元二十四年立國子學而定其制
設博士通掌學事分教三齋生員講授經旨究正

音訓復設助教同掌學事而專守一齋正錄申助
規矩督習課業

元文類世祖即位內設胄監外設提舉官以領學
校至元八年頒行國字又設蒙古字學視儒學而
加重焉

謹案元以蒙古國子監屬翰林院國子監屬集
賢院別置興文署以教授生徒其制興唐宋稍
異又歷代皆以品官子弟為國子生士民子弟

為太學生分學教肄自元以七品以上朝官子
孫為國子生而取庶民之俊秀者為陪堂伴讀
始合太學生於國子至今遂沿為定法其置游
藝依仁據德志道時習日新六齋令博士分教
以次遞陞見選舉志亦今國子監六堂之制所由昉
也

明

明史職官志 國子監祭酒一人

從四品

司業一人

正六品

品其屬繩愆廳監丞一人正八品博士廳五經博士

五人從八品率性修道誠心正義崇志廣業六堂助

教十五人從八品學正十人正九品學錄七人從九品典

簿廳典簿一人從八品典籍廳典籍一人從九品掌饌

廳掌饌二人未入流祭酒司業掌國學諸生訓導之

政令監丞掌繩愆廳之事以叅領監務堅明其約

束諸師生有過及廩膳不潔竝糾愆之而書之於

集愆冊博士掌分經教授而時其考課典簿典文

移金錢出納支受典籍典書籍掌饌掌飲饌明初
即置國子學設博士助教學正學錄典樂典書典
膳等官吳元年定國子學官制增設祭酒司業典
簿洪武八年又置中都國子學秩正四品命國子學分
官領之十三年改典膳為典饌十五年改為國子
監秩從四品設祭酒一人司業一人監丞典簿各
一人博士三人助教十六人學正學錄各三人掌
饌一人中都國子監制亦如之二十四年更定國

子監品秩員數中都國子監設祭酒司業監丞典簿博士學正學錄掌饌各一人助教二人品秩與在京同二十六年罷中都國子監永樂元年置國子監於北京設祭酒司業監丞典簿博士學正學錄掌饌各一人助教二人宣德九年省司業弘治十五年復設明初祭酒司業擇有學行者任之後皆由翰林院官遷轉

明史選舉志明初改應天府學為國子學後改建

於雞鳴山下既而改學為監設祭酒司業等官分
六堂以館諸生厚給廩餼其教之之法每旦祭酒
司業坐堂上屬官自監丞以下首領則典簿以次
序立諸生揖畢質問經史拱立聽命惟朔望給假
餘日升堂會饌乃會講復講背書輪課以為常永
樂元年始設北京國子監十八年遷都乃以京師
國子監為南京國子監而太學生有南北監之分
矣

謹案三代成均之法如師氏大司樂等其職皆主於教國子呂祖謙謂國子是世祿之家鮮克由禮不可不設官以教養之而鄉遂州黨所興賢能之士不更見有掌教之官當由學校事重非有司簿書期會所領不隸於六官故周禮未之及也秦漢而後建學者雖以國子為名其實世官之法久廢所教皆民間之俊選故自西漢時博士弟子已多至數千人歷代相沿員額浸

廣設官分課損益非一於人材固多所造就而
教之無法流弊亦往往潛滋如東漢太學諸生
三萬餘人各立部黨自相標榜史稱其噬枯吹
生三府辟召常出其口公卿以下莫不畏其貶
議致釀成黨錮之禍流毒無窮逮宋而太學生
恣橫尤甚靖康之季以請用李綱至於聚衆數
千伏闕槌鼓擊殺中使宋廷無可如何比南渡
而太學尤皆闖茸之流大抵以獻頌拜表希望

恩澤一有不及謗議喧然甚且三學諸生動稱
捲堂大散挾制朝廷目無法紀迄於明世遺習
尚存及其末造而請以魏忠賢配享孔子者即
出於太學諸生儒風掃地洵由法制不立教化
不明無以整齊約束之所致也

國家學校風行教思廣被

皇上崇儒重道屢蒙

聖駕臨雍釋奠懋舉隆儀太學

文廟發帑重葺易覆黃瓦規制有加茲復

特命增建辟雍典章美備橋門壁水益煥新模槐市

生徒沐浴

聖人之化澤無不奮興觀感以共游於蕩平正直之
途訓厲漸摩士風丕變譽髦興咏信為遠軼周
京矣

欽定歷代職官表卷三十四